



Inatsisartunut ilaasortamut
Mette Arge-Hammeken
Naleraq

**Kalaallit Nunaanni Jameson Land-imi uuliasiorluni misissuinerup killiffia
pillugu § 37 naapertorlugu apeqquteqaammut nr. 214-2025-mut akissut.**

22-12-2025
Suliap nr.

Inatsisartut suleriaasianni § 37, imm. 1 naapertorlugu apeqqutit matuma
kinguliani allassimasut saqqummiuppatit, taakkualu matumani
akissuteqarfigineqarput.

Postboks 930
3900 Nuuk
Tlf. (+299) 34 68 00
Fax (+299) 32 43 02
E-mail: asn@nanoq.gl
www.naalakkersuisut.gl

Apeqqut 1:

**Kalaallit Nunatsinni Jameson landimi uuliasiorloqarnissaanut suliaq
sumut killinneranik Naalakkersuisut qanoq
ilisimatitsissuteqarsinnaappat?**

Apeqqummut 1-imut akissut:

Maannakkorpiq Jameson Land-imi uuliasiorluni misissuinissamut
akuersissutit ingerlatsivigineqartut pingasuupput: OEEL 2018-40, OEEL
2015-13 aamma OEEL 2015-14, ataatsimoorlutik sumiiffiup
annertunersaaniillutik. Akuersissutitut pingasunut tamanut
pisinnaatitsissummik pigisaqartuuvoq Tuluit Nunaanni aallaaveqartoq
ingerlatseqatigiiffik White Flame Energy A/S.

Akuersissutit aatsitassat pillugit ingerlatallu tamatumunnga pingaarutillit
pillugit inatsisartut inatsisaat (inatsit nr. 7, 7. december 2009-meersoq,
aatsitassanut ikummatissanullu inatsit) naapertorlugu tunniunneqarput.
2021-mi Kalaallit Nunaanni uuliasiorluni misissuinerit siunissami
unitsinnissat pillugu Naalakkersuisut aalajangiinerat sioqqullugu taakkua
tunniunneqarput, taamaattumillu sulii atuullutik.

Misissuineq piffissaliussat misissuiffiusussat katillugit pingasuusut
siullersaani inissisimapput. Piffissaliussaq siulleeq 31. december 2028
tungaanut ingerlasussaavoq. Ingerlatseqatigiiffik killigititaq taanna
tikinngikkaa piffissamut sulinissamut pisussaaffimminik
naammassinnissimappat, misissuinermik suliaqarneq piffissaliussani tulliini
ingerlaannarsinnaavoq.

Apeqquut 2:

Uulisiorneq qaqugu aallartinnissaa pilersaarutaava?

Apeqqummut 2-mut akissut:

Ingerlatseqatigiiffiup Naalakkersuisunut aamma tamanut oqaatigaa, sumiiffinni akuersissuteqarfiusuni 2015-13-imi aamma 2015-14-imi 2026–2027-mi ukiuunerani uuliasiorluni misissuinerimi qillerinerit ingerlannissaat pilersaarutigineqartoq.

Taamaattoq ingerlatsisoqassappat tamanna sioqqullugu ingerlatseqatigiiffik VVM-imut aamma VSB-imut nassuiaatinik (avatangiisinut sunniutaasussanik aamma inuiaqatigiinni piujuaannartitsisumik ingerlatsinermik naliliineq) suliaqartussaavoq akuersissuteqarfigitittussaallugillu. Nassuiaatit taakkua tamatuma kingorna tamanut ammasumik tusarniaassutigineqartussaapput.

VVM-imut aamma VSB-imut misissuinerit aatsaat akuerineqareerpata, ingerlatseqatigiiffik qillerinerit pilersaarutigineqartut ingerlannissaannut akuersissummik qinnuteqarsinnaavoq. Qinnuteqaatit ilisimatuussutsikkut siunnersortit allallu teknikkinut naleqquttunik immikkut ilisimasallit suleqatigalugit Naalakkersuisuni aatsitassanut oqartussamit nalilersorneqartussaapput. Sukumiisumik qillerinerit ingerlanneqarnissaat kiisalu qillerinernik suliaqarnerup ingerlatassallu tassunga atasut avatangiisinut inuiaqatigiinnullu sunniutissaat naatsorsuutigineqartut, qinnuteqaatini nassuiarneqartussaapput.

Apeqquut 3:

Jameson landimi uuliasiorloqalissappat Ittoqqortoormiuni nunaqavissut sulisuusinnaanissaminut periarfissaat suuppat?

Apeqqummut 3-mut akissut:

Maannakkorpiaq eqqoqqissaartumik akineqarsinnaanngilaq, tassami tamatumunnga siunissami VSB-imut nassuiaatip akuerineqartup kiisalu tamatuma kingorna ingerlatassanut qinnuteqaatit imarisassai apeqqutaasussaammata. Tassani qillerinernik suliaqarnerup pilersaarutigineqartup annertussusissaa allassimassaaq, ilanngullugu sulisussat najukkaneersut tikisitallu agguarsimanerat.

Uuliasiorluni misissuinerimi qillerinernut atatillugu suliaqarnerup annertunerpaartaa qaffasissumik immikkut ilisimasalinnit ingerlanneqartussaavoq. Taamaattoq naatsorsuutigineqartariaqarpoq assassornermik tunuliaqutilinnik kiisalu kiffartuussilluni ingerlatassanut, soorlu eqqiaanermut, nerisaqartitsinermut kiisalu maskiinani truck-inilu aquttunik sulisoqarnissaaq pisariaqartinneqartussaasoq.

Apeqquut 4:

Nunaqavissunut sulerusuttunut pikkorissaanerit ingerlanneqarniarpat?

Apeqqummut 4-mut akissut:

Apeqquut 3-misuulli tamatumunnga VSB-imut nassuiaat pisussaq aammalu qillerinernik suliaqarnissanut pilersaarutit sukumiisut apeqquutaasussaapput. Taamaattoq naliliisoqarpoq najukkaneersut sulisussat suliaassanut ataasiakkaanut tunngatillugu naleqquttunik pikkorissaanernik ilinniartitsinernillu neqeroorfigineqarnissaat ilimanarteq.

Apeqquut 5:

Uuliasiortoqalissappat Ittoqqortoormiuni mittarfittaassaq iluaqutigilluarneqassava?

a. Iluaqutigilluarneqassappat sutigut?

Apeqqummut 5-imut akissut:

Misissuinerup maannakkut killiffiani qillerinerit pilersaarutigineqartut annertussusissaat inernissaallu kiisalu najukkaneersunik akuutitsinissaq suli ilisimaneqanngimmata, ersarissumik akissuteqarnissaq ajornakusoorpoq.

Taamaattoq naliliisoqarpoq Ittoqqortoormiini mittarfissaq misissuinernik suliaqarnernut pitsaasumik iluaqutaasinnaassasoq, pingaartumik sulisut aammalu atortut oqinnerusut Jameson Land-imi sumiiffinnut qilleriffiusussanut najukkaniit, nunamit namminermiit nunanillu tamalaaniit assartorneqarneranni ingerlasussanik piareersaanermi anigorniagassanut tunngatillugu.

Apeqquut 6:

Aamma mittarfittaassaq uuliasiorfimmi atugassanik nerisassanillu niuernerillu eqqarsaatigalugit tassuuna iluaqutaassappat mittarfik qanoq takitigisoq pisariaqartinneqassamaarpa?

Apeqqummut 6-imut akissut:

Jameson Land-imi siunissami uuliasiorluni misissuinerimi ingerlatassaasinnaassunut tunngatillugu, timmisartut qanoq ittut angallassisinnaanerannut, taamaalillunilu sulisut atortullu assartorneqarnissaannut pisinnaasassanut, mittarfiup takissusaa pingaaruteqartussaavoq.

Kisianni maannakkorpiaq qillerinermi ingerlatassanut pilersaarutit sukumiisut suli pigineqanngimmata, mittarfiup takissusissaanut piumasaqaatit minnerpaaffissaannik aalajangersimasunik

aalajangersaasoqarsinnaanngilaq. Aammattaaq naatsorsuutigineqarpoq
atortut oqimaatsut, soorlu qillerinermi atortut aamma entreprenørmaskinat,
mittarfiup annertussusiligaanera apeqqutaatinnagu imaatigut sumiiffimmut
qilleriffiusussamut assartorneqartussaasut.

Inussiarnersumik inuulluaqqusillunga

Med venlig hilsen

Best Regards



Naaja H. Nathanielsen

Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut

Naligiissitaanermullu Naalakkersuisoq

Naalakkersuisoq for Erhverv, Råstoffer, Energi, Justitsområdet og Ligestilling.

Ministry of Business, Mineral Resources, Energy, Justice and Gender Equality